

समे – 12:25

<><><><><><>

PM-IATA

प्रधानमंत्री नरेन्द्र मोदी होर अज्ज नमीं दिल्ली दे भारत मंडपम च अंतर्राष्ट्रीय वायु परिवहन संघ दी 81मीं सलाना आम बैठक च हिस्सा लैगन। प्रधानमंत्री बैठक गी संबोधत बी करगन। विश्व ब्हाई परिवहन शिखर सम्मेलन, विमानन उद्योग दे सामने पेश होने आले प्रमुख मुद्दे पर ध्यान केन्द्रित करोग। इंदे च एयरलाइन संपर्क, ऊर्जासुरक्षा, सतत विमानन ईंधन उत्पादन, कार्बन डायक्साइड उत्सर्जन घट्ट करने दी कोशश ते नवाचार शामिल न। प्रधानमंत्री हुंदे दफ्तरै दे इक ब्यान च आखेआ गोआ ऐ जे कार्यक्रम दे दरान दुनिया भरै दे नेता विमानन खेत्तर च भारत दी उल्लेखनीय प्रगति ते देश दे सामरिक आर्थिक विकास च योगदानदे गवाह बनगन।

<><><><><><>

Tourism Jammu

मैहकमा सैलसफा आसेआ अज्ज 2 जून थमां लेइयै औंदी 5 जून तोहड़ी जम्मू च 'स्टार्स इन द टाउन' दे बैनर हेठ केई सारे सांस्कृतिक ते समुदायिक कार्यक्रमें दा सरिस्ता कीता जा'रदा ऐ। इ'नें कार्यक्रमें दी शुरुआत अज्ज सतवारी दे आमंत्रण रिजार्ट च डोगरी व्यंजनें आहले इक उत्सव कन्नै होआ'रदी ऐ। एहदे अलावा अज्ज गै कटड़ा च कैडल मेमोरियल नांS दे इक कार्यक्रम दा बी आयोजन कीता जा'रदा ऐ जेहदे राहें पहलगाम आतंकी हमले दे शहीदें, बन्ने पारा गोलाबारी दरान मारे गेदे लोकें ते भारती थेहारबंद बलें गी श्रद्धांजलि अर्पित कीती जाहग। एहदे परैन्त कल 3 जून गी विश्व सैकल दिवस दे मौके उपपर सैलानी थाह पत्नीटॉप च इक कार्यक्रम लोआया जाहग जेहदे राहें लोकें गी तंदरुस्त रौह ते सेहतमंद जीन जीने दा स्नेहा दित्ता जाहग। मगरा 4 जून गी भद्रवाह च इक सांस्कृतिक संध्या दा आयोजन कीता जाहग जेहदे च मुकामी कलाकार अपनी प्रस्तुतियां पेश करडन। एहदे अगले ध्याड़े यानि 5 जून गी पत्नीटॉप च विश्व पर्यावरण दिवस दे मौके उपपर बी कार्यक्रम दा सरिस्ता कीता जाहग। सैलसफा मैहकमे नै सब्भनें मुकामी बसनीकें ते सैलानिएं गी बी सादा दित्ता ऐ जे ओह खित्ते दे बक्ख बक्ख हिस्सें च करोआए जाने आहले इ'नें कार्यक्रम च बधी-चढियै शामिल होन।

<><><><><><>

Lavender Festival

भद्रवाह च जारी लवेंडर फेस्टिवल दा अज्ज दुआ ध्याड़ा ऐ। अज्जै दे मुख कार्यक्रमें च लवेंडर दे खेत्तरें दे दौरे, फुल्लें थमां इत्र तैयार करने सरबंधी डिस्टिलेशन प्रक्रिया दा लाईव प्रदर्शन, खशबूदार उत्पादें आहली इकाइए दे दौरे ते तकनीकी सत्र शामिल न। द'उं दिनें दे इस उत्सव दा उद्घाटन केन्द्री मंत्री डाक्टर जीतेन्द्र सिंह होरें कल कीता हा ते अज्ज एह उत्सव संपन्न होई जाहग। एहदा आयोजन, खित्ते च लवेंडर दी रड़ दी कामयाबी ते समर्थ दा जश्न मनाने दे मकसद कन्नै कीता जा'रदा ऐ। लवेंडर फेस्टिवल नै खशबूदार बूहटें दी रड़

आहले खेत्तर च मजूद मौकें दे प्रदर्शन ते खित्ते दी राई—बाई आधारित अर्थबवस्था गी बढ़ावा देने च खरी मती गिनतरी च करसानें, उद्यमिएं ते सैलानिएं गी आकर्षित कीता ऐ।

<><><><><><>

Nalin Kheer Bhawani

जम्मू कश्मीर पुलसा दे इंस्पैक्टर जनरल नलिन प्रभात होरें कल गांदरबल स्थित माता क्षीर भवानी मंदरे च जाइयै मत्था टेकेआ। दौरे दरान उनें औंदे क्षीर भवानी मेले लेई सुरक्षा ते होर दुइए तैआरिएं दी समीक्षा कीती ते सरबंधत अधिकारिएं ते मेले सरबंधी मकामी हितधारकें कन्नै बी गल्लबात कीती। अधिकारिक जानकारी मूजब मेले गी पूरी चाल्ली सुरक्षत ते बवस्था आले ढंगै सिर तोड़ चाढ़ने लेई लोड़चदे सब्बै बंदोबस्त कीते जा करदे न। ऐकती एह मेला 3 जून गी शुरू होआरदा ऐ।

<><><><><><>

Viksit Krishi Rajouri

राई—बाई खेत्तर गी बढ़ावा देने दी इक बड़्डी पैहलकदमी दे तैहत रम्मेआ गेदा विकसित कृषि संकल्प अभियान, करसानें गी इक्क ऐसा बधिया मंच उपलब्ध करोआ करदा ऐ जेहदे राहें ओह राई—बाई सरबंधी साईसदानें ते बक्ख—बक्ख मैह्कमें दे अधिकारिएं कन्नै जुड़ी सकै करदे न। इस अभियान दा मकसद राई—बाई सरबंधी अज्जै—कल्लै दिऐ तकनीकें, सरकारी योजनाएं ते कृषि सरबंधी टिकाउ तौर—तरीकें बारै जागरूकता पैदा करना ऐ। इस अभियान दे तैहत बन्ने आहले जिले रजौरी दे ढांगरी इलाके दे करसानें गी कृषि विज्ञान केन्द्र रजौरी ते होरनें मुतल्लका मैह्कमें दे माहिरें कन्नै गल्लबात दा मौका थोआ जेहदे राहें उनेंगी राई—बाई दे बेहतरीन तौर—तरीकें अपनाने च मदाद थोग।

<><><><><><>

IPL Cricket

आईपीएल क्रिकेट च जंदी रातीं अहमदाबाद दे नरेन्द्र मोदी स्टेडियम च होए दे दुए क्वालीफायर मुकाबले च पंजाब किंग्स नै 5 बारी दी जेतू मुंबई इंडियंस गी हराइयै फाईनल च थाहर बनाई लैती ऐ। मुंबई इंडियंस आसेआ दित्ते गेदे 204 रन्जें दे लक्ष्य दा पिच्छा करदे होई पंजाब किंग्स नै 19 ओवरें च गै 5 विकटें दे नुक्सान पर 207 रन्ज बनाई लैते। पंजाब किंग्स दी तरफा कप्तान श्रेयस अय्यर नै सब्बनुं शा मते नाबाद 87 रन्ज बनाए। एहदे शा पैहले मुंबई नै तय 20एं ओवरें च 6एं विकटें पर 203 रन्ज बनाए हे। इस जित्त दे कन्नै पंजाब किंग्स दी टीम हून फाईनल च पुज्जी गई ऐ जित्थे ओहदा मुकाबला कल अहमदाबाद दे नरेन्द्र मोदी स्टेडियम च गै रॉयल चैलेंजर्स बैंगलुरु कन्नै होग। ध्यानजोग ऐ जे पंजाब किंग्स नै अजें तोहड़ी कदें बी आईपीएल दा खिताब नैई जित्ते दा ऐ।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर

खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौंहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी जम्मू कश पंजीतीर्थी 15 जून 2025 थवां पैहले-पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>